



# QUÆSTIO MEDICA,

19.

## CARDINALITIIS DISPUTATIONIBUS

manè discutienda in Scholis Medicorum, die Jovis

26 Februarii 1722.

RAYMUNDO-JACOB FINOT,

DOCTORE MEDICO PRÆSIDE.



*An Frictus sit salutaris ?*

### I.

**T**ANTA est proportio, liquidum inter & firmum, firmum & firmum diversi & ejusdem generis, liquidum & liquidum cujuscumque generis, inter partes corporis quoad molem, duritiem, numerum, situm &c. ut amborum uno mutato mutetur & alterum necesse sit. Utrumque quot habeat phases infandum ! Qualis utriusque commutatio vix dicendum ! Amborum vicissitudines, ex uno in alterum transformationes, inter utrumque analogiam, proportionem, comparisonem, similitudinis atque dissimilitudinis diversos respectus enarrare quis poterit ? Multifariam enim multisque modis alterantur, corrumpuntur, generantur, atque metamorphosi omnimodâ, tot tamque diversæ quinimò omnes formæ educuntur è materiæ penu quæ est omnium corporum subiectum, eorumque proprietatum fons & origo, quippe quæ omni & soli corpori communicatur multigenis variata figuris, modò enim simplex modò diversa sentitur, uniformis modò, modò varia, homogenea, heterogenea, constans, mobilis,

*Non quod multa parum simili sint prædita formâ,*

*Sed quia non vulgò paria omnibus omnia constant.*

materia enim nusquam destruitur, neque cadaver est, neque sepulchrum, sed cadaver & sepulchrum sibi; nec Cælo, nec terris, nec aquis, sed ubique jacet; horumce nulla est, sed omnia: ipsa enim totius mundi hujusce aspectabilis pro theatro sese mutuò præbet atque subicitur in quo personas omnes hujus comedix rectè regit author motus ex quo figuræ formantur, aggeritur moles, nascuntur tandem omnes corporis modificationes perituræ, in nova corpora denuò mutandæ. Ipse si quidem totus occupatur in corporum omnium conciliandis figuris, nihil quod penes eum non sit, totum & omne regit, gubernat, producit, destruit, na-

A

Lucr. l. 2.  
vers. 336. 337.

2

turâ tamen semper remanente constanti indestructibili cujus facies semper eadem.

## II.

**C**ORPUS in partium ipsium componentium motu constanti perpetuoque consistens, pro ipsius motûs quantitate, diversitate, modo, temporis spatio & aliis circumstantiis quibus afficitur tale aut tale in sua specie prædicatur: ipsum autem judicatur sanum pro hujusce systematis legum rectitudine aut ab ipsis deviatione. Vitam hominis quamdiu durat in partium corporis functionibus tum vitalibus, tum naturalibus, tum animalibus consistere, nemo est qui inficiatur: ipsas augeri, minui, vita superstiti, deprehenditur, cum in iisdem sit ingens graduum diversitas; sanitas enim est facultas corporis apta omnibus actionibus perfectè exercendis, & omnes actionum illarum effectus ad motus determinatos & ad assumptorum immutationem revocantur. Status ergo corporis viventis habens facultatem exercendæ cujuscumque actionis dicatur sanus, cujus idea est præsentia requisiti ad exercitium possibile actionis vel absentia repugnantis exercitio eidem; qui enim actiones homini proprias exercere valet cum facilitate, oblectamento & quâdam constanti eum sanum habemus, quem verò easdem exercere non possè aut tantum eas peragere cum molestiâ, dolore citaque defatigatione animadvertimus, eundem vocari & esse ægrotantem quis negaverit? Ut itaque actiones sic morbi distingui possunt, ut conditiones ad actiones, ita & harum defectus, qui enim haberet perfectè intellectas omnes condiciones requisitas ad actiones, ille perspiceret clarè defectum conditionis ex cognito morbo, & rursum benè caperet ex cognito motûs defectu naturam morbi inde necessariò sequentis. Motûs igitur mensura, naturæ mensura, unde sanitatis sive subsistentiæ mensura.

## III.

**A**TQUI corporis exercitatio hanc constantiam in functionibus conservat & auget; sive enim contineat solida & liquida in sua rententiâ æquilibri, relaxando fibras crispas, contrahendo filamenta partium solutarum, vacuando humorum redundantiam, sanguinis & humorum diathesim alterando, istorum citiorem motum compescendo, ipsum lehtiorem provehendo, utriusque partis molem augendo, minuendo, sive aliis quibusque modis vitam servet, augeat, roboret. Omnes enim corporis partes ad sui ipsius sanitatem non solum contribuant efficiendam, sed ipsæmet partes naturaliter dispositæ & motæ sunt sanitatis causa essentialis & proxima atque ipsissima sanitas, quæ pendet à rectâ sex rerum non naturalium administratione: ex istorum enumeratione principem locum tenent frictiones in motuum genere, quæ sunt levissimæ exercitationes quarum diversitas salubritasque desumuntur à tempore, loco, mensura, & modo quibus corpori adhibentur. Excretio crassi tenuissimis juvanda iis quæ magis excitent fibras & solvant excernenda: præcipua sunt vapores, fatus, inunctiones, balnea concomitante frictu: juvenibus enim, senibus, & iis quibus viscera debilia, difficilis digestio, vita quieta, sedentaria, otiosa; hæc maximè profunt præsertim si habea-

tur ratio ætatis, temperamenti, consuetudinis, & aliarum circumstantiarum quæ pertinent ad Hygienem. In genere modus faciendæ frictionis definitur rubore & tumore, tunc enim à frictione abstinendum præsertim si corpus gracile fuerit reficiendum, si crassum extenuandum. Convenit frictio tempore hyberno & autumnò, depositis priùs excrementis tum alvi tum vesicæ, tunc aut totum corpus aut pars fricanda lavanda, sordes detergendæ, & linteis modicâ compressione ac celeritate fricandum.

#### IV.

**M**ULTÆ sunt frictionis species. Duplex tamen hic loci maximè consideranda venit, præparatoria scilicet & apotherapeutica. Illa exercitationes præcedit ne quid rumpatur vel obstruatur mutatione subitâ à quiete ad motum; etenim frictione exiguâ partes solidæ incallescunt remolliuntur, excrementa extenuantur meatusque laxantur: hæc verò minoribus & blandioribus motibus perficitur cum olei perfusione quæ partes corporis humectat ac recreat; si quid hæreat meatibus discutit & corpus à lassitudine tutum reddit. Si frictio fuerit mollis carnem laxat, mollior, meatus aperit; si fuerit dura cogit, siccatur & adstringit; pauca carnem leviter remittit, redditque contrectabilem; multa liquat, & extenuat & si dura simul fuerit contrahit, corporisque molem deprimit; mediocrius verò modicè calefacit, distributionem juvat & carnem auget. Frictio adhibetur ad reficiendum, vacuandum, revellendum. Nam quos siccitas macerat vespertina artuum juvat frictio ut in partes externas sanguis distribuatur. Si purgatio universa aliquid reliqui fecerit frictione discutitur; eadem ratione capitis & artuum frictio matutina reſeratis cutis meatibus humores eliminat. Ad revellendum etiam advocatur frictio, foras enim materiem evocat ac digerit, quâ discussa alia in partem defricatam confluit: si totum corpus fricari convenit, primùm crura à superiore parte deorsum, linteis non admodum mollibus, sed modicè asperis, deinde & tota brachia ab humeris usque supernè deorsum simili modo sunt fricanda; at ubi artus omnes abundè calere videntur & metus est ne quis ex multitudine frictionis lassitudinis sensus superveniat, oleo utendum est: cùm jam artus plurimùm perfricti fuerint, postea oleo detergentur. Inde ad dorsi spinam transeundum est, hæcque tota perfricanda similiter, ab hac rursus ad crura & hinc ad brachia, mox inde rursus ad spinam remeandum & ita quantum necesse est fricandum.

#### V.

**S**ICUT inchoante rachitide, existente phthisi, crescente senio, conducit introductio nutrimenti per apposita externa halitu, fotu, balneo, clysmate, unguento; ita purgationes cutis externæ per frictiones, loturas, balnea, fomenta, natationes, deterſiones egregiè profunt. Capitis præsertim scalpura cum pectine retrorsum in vertigine, epilepsia, ophthalmia, aurium dentiumque doloribus, tonsillarum, gingivarum, uvæ inflammationibus, cervicis atque totius capitis fluxionibus. Collutio oris est quædam deterſionis atque frictionis species quæ adhibetur in aphthis, & aliis dentium, linguæ, palati, uvulæ & aliarum partium oris

4  
doloribus atque morbis. Quotidie cum tepidâ est prophylacticum oris ;  
sicut & levis deterfio oculorum, aurium, totius faciei, pedum manuum-  
que, axillarum & inguinum cum leviori frictione. Universas corporis par-  
tes suis mensurâ & modo sigillatim fricari oportet. Frictionibus enim  
color & calor nativi augmentur, naturales actiones in toto corpore feli-  
citus perficiuntur, excrementa expelluntur, exigui meatus purgantur,  
membra aluntur & fiunt ad labores robustiora. Frictiones supplent aëris  
& loci mutationi, deambulationi & aliis exercitiis à motu locali. Qui  
litterarum studio incumbunt, qui morbo laborantes in cubili detinen-  
tur, aut qui saltationi, pilæ magnæ & parvæ ludo, deambulationi,  
equitationi, vehiculo sive currui, lecticæ, navigio assueti hisce exercitiis  
non indulgent, eos fricari bonum est.

*Ergo Frictus est salutaris.*

Proponebat Parisiis DAVID VASSE, Parisinus, Baccalaureus  
Medicus, A. R. S. H. 1722. à sextâ ad meridiem.

---

Typis J. QUILLAV, Universitatis & Facultatis Medicinæ Typographis